

Date – 20/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Ministry of DoNER chuan Thenzawl-a Heliports leh Helipad din tura ruahman mek chu tourism tih hmasawnna tur leh rikrum thila tangkaia taka hman ani dawn tih a sawi.
2. Health and Family Welfare Department tarlan danin kumin January thla atanga October inkarah mi 121 in TB natna an thihpui tawh.
3. Dampa assembly bial hun laklawha inthlanna chu PC party-in an chuh ve dawn a, naktuk Thawhlehi hian an candidate turin a hming a pelut ang.
4. Vawiin Diwali pualin President Droupadi Murmu, Vice President C P Radhakrishnan leh Prime Minister Narendra Modia te chuan ramchhung mipuite duhsakna an hlan.

<><><>

THENZAWL HELIPORT & HELIPAD

Ministry of DoNER chuan Thenzawl-a Heliports leh Helipad din tura ruahman mek chu tourism tih hmasawnna tur leh rikrum thila tangkaia taka hman ani dawn tih a sawi.

Ministry of Development of North Eastern Region tarlan danin Thenzawlah Heliport leh Helipad din tura ruahman ani a ti a, hei hi North East Special Infrastructure Development Scheme (NESIDS) hnuaiah niin cheng vaibelchhe 12 ruahman ani a ti a, hei hian state chhunga inpawhna tha zawk a siam beisei ani tih sawiin tourism tih hmasawnna atana kawng pawimawh tak anih bakah rikrum thilah a tangkai dawn tih a sawi.

Ministry of DoNER sawi danin he hmalakna hian zin mi te tan kawng awlsam zawk a thlen dawn tih sawiin Mizoram hmun hrang hrang tlawh theihna kawng awlsam a siam sak dawn a ti a, sawrkar laipui hmalakna hnuaiah hmarchhak bialah hmasawnna tam tak thlen ani a ti bawk.

<><><>

TRUCKERS

Mizoram ei leh bar lakluhna kawngpui pawimawh Kawnpui leh Sairang inkar kawng chhia siamtha turin tun thla ni 25 hmaa hmalakna lian tham a awm loh chuan NHIDCL chungah engpawh thleng se sawi theih an nei lo tih truck neitu leh khalhtute chuan an sawi.

Mizoram Truck Owners' Association (MTOA) leh Mizoram Truck Drivers' Association (MTDA) chuan inrinni khan thuchhuah intawm siamin, Kawnpui leh Sairang inkar NHIDCL enkawl chu hun eng emaw chen tlan hleih theih loh khawpin a chhia an ti a. Ruah a tlak tawh loh hnu pawhin tih tak taka thawh a awm lo ni a an hriat thu leh an truck te a tlu-in a chhiat phah nasa tawh hle tih an sawi a. An pawl 2

member te tawrhna leh thinurna chu a sosang tawh hle tih sawiin, tun thla ni 25 theng an ngaichan hnuah hmalakna lian tham an hmuh loh chuan he lai kawng enkawltu NHIDCL chungah engpawh thleng se sawi theih an nei lo tih an sawi a ni.

Hemi chungchanga Akashvani Aizawl zawhna chhangin, MTOA general secretary Pu Dina Tlau chuan Kawnpui atanga Sairang inkar kawngpui chu hun engemawchen chhung namen lovin a chhe tawh a, sorkar leh he kawngpui enkawltu NHIDCL pawh an dawr fo a, an siam dawn tiin kum a liam leh thin a, tun hun hi an thleng ta tih a sawi a ni.

<><><>

TB

Mizoram Health and Family Welfare Department tarlan danin kumin January atangin mi 121 in TB natna an thihpui tawh.

Health Department sawi danin kumin 2025 January atanga October ni 10 inkarah TB vei mi 1870 hmuhchhuah anni a, heng zingah hian mi 121 in an thihpui a ni.

Department chhinchhiah danin Mizoram hmun hrang hrangah TB umbo tura theihtawp an chhuahna ah sample 97,647 chu test tawh an ni a, heng zingah hian mi 1870 chu TB an vei tih hmuhchhuah niin an zingah hian hmeichhia 744 awmin mipa 1126 an awm a ni.

Health Department chuan TB vei mi 1870 zingah hian a tam zawk enkawl dan anni a ti a, an zinga za zela 82 chu enkawl dam anni tih sawiin TB vei 1870 zinga 1761 chu kum 14 chunglam niin mi 104 chu kum 14 hnuailam anni a, kum 2020 hnu lamah TB natna thihpui leh TB vei thar chu an pung chho zel an ti bawk.

Department tarlan danin kum 2020 ah TB thihpui mi 31 awmin kum 2021 ah mi 46 an awm a, kum 2022 ah mi 87 in thihpuiin kum 2023 ah mi 119 an ni a, kum 2024 ah mi 136 in thihpuiin TB natna avanga thi hi kum 2020 hnu lamah mi 540 an awm tawh a ni.

Sawrkar laipui chuan TB natna umbo anih theihnan theihtawp chhuahin kum 2022 khan President Droupadi Murmu chuan rampuma TB umbo beihpui thlakna atan TB Mukht Bharat Abhiyan a hawng a, Union Health & Family Welfare Minister JP Nadda-a'n kumin chhunga India ram atanga TB natna umbo turin theihtawp chhuah a ni, a ti a, khawvelin kum 2030-ah TB natna umbo hman tum mahse India atang erawh chuan kumin chhungin umbo theih beisei a ni a ti bawk.

<><><>

DAMPA BYE-POLL

Dampa assembly bial hun laklawha inthlanna chu PC party-in an chuh ve dawn a, naktuk Thawhlelni hian an candidate turin a hming a pelut ang.

People's Conference (PC) party president Pu Vanlalruata'n Akashvani Aizawl a hrilh danin Dampa assembly bial bye-election hi an party chuan chuh an tum a. An candidate tur chuan Thawhlelni khian he inthlanna a returning officer hnenah a nomination a thehlut dawn a ni. PC Party-in an chuh ve dawn takah chuan Dampa bial bye-election chuhtu hi mi 5 an awm dawn ta a. Bhartiya Janata Party (BJP), Congress, MNF leh rorellai ZPM-te chuan an candidate tur an puan tawh bakah an

candidate-te hian chuh turin an hming an pelut vek tawh a. He tih lai hian independent a ding tur an awm awm thawm hriat a ni lo.

BJP chuan kum 2023 a he lai biala Congress candidate, tunhnai a an party zawmtu Pu Lalhmingthanga chu an vawrh a, Congress chuan Minister hlui Pu John Rotluangliana an candidate a. MNF chuan an party senior vice president leh Minister hlui Dr. R. Lalthangliana dintirin ZPM atangin kum 2023 inthlana tling zo tawh lo Pu Vanlalsailova an din nawn tir leh bawk a. Candidate leh party hrang hrangte hian vote zawn beihpui an thlak mek a ni.

Dampa assembly bial bye-election a tul chhan chu July ni 21-a helai bialtu MLA Pu Lalrintluanga Sailo MNF a thih vang a ni a. Bye-election atan hian November ni 11 khian vote thlak a ni ang a, November ni 14-ah vote chhiar a ni dawn a ni.

<><><>

ZMC&H

Mizoram sorkarin Zoram Medical College & Hospital-ah post graduate (specialist) zir phalna a dil chu National Medical Commission-in subject 5-ah seat 10 a phalsak.

Akashvani Aizawl zawhna chhangin, ZMC&H Director Dr. Zoramthara Zadeng chuan ZMC&H-a specialist zir theih turte hi subject 5- Paediatrics (MD), General Surgery (MS), General Medicine (MD), Obstetrics & Gynaecology (MS) leh Anaesthesiology (MD)-ah te seat 2 theuh a ni tih sawiin, National eligibility cum entrance test (NEET) PG Entrance exam result a zirin ZMC&H atanga PG zir tum ti tha zualte'n remchang an nei tha dawn a ti a. October atanga December thla chhung hian NEET PG counselling a awm mek tih sawiin, chuta tling te chuan an thlan kim hunah ZMC&H a post graduate zirlai hmasa berte chuan nakkum 2026 January thla atang khian an zawm tan theih a rin thu a sawi a ni.

Health & Family Welfare Pi Lalrinpuii pawhin Zoram Medical College & Hospital-ah Post Graduate zirna an dil angin, seat 10 phalsak an ni chu lawmawm a tih thu a Facebook account kaltlangin a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DIWALI

Vawiin Diwali pualin President Droupadi Murmu, Vice President C P Radhakrishnan leh Prime Minister Narendra Modia te chuan ramchhung mipuite duhsakna an hlan. President Murmui chuan he kut hi hlimna kut anih thu sawiin mahni inenlet nan leh hmasawnna tur kut anih thu sawiin in unauna leh inngainatna thlen se a duh thu a sawi.

Vice President Radhakrishnan pawhin mipuiten malsawmna tam tak an dawn a duhsak thu a sawi. Prime Minister Narendra Modia chuan mipuite Diwali chibai bukin he eng kut hian mipuite nunah harhtharna

thlen se a duh thu a sawi a. Ralmuanna, hlimna leh hausakna mitin nunah lo thleng se rampumah thil tha lam lo thleng zel se a duh thu a sawi a ni.

<><><>

NDRF

Sawrkar laipui chuan Karnataka leh Maharastra te tan ruahsur leh tuilian avanga chhawmdawlina SDRF atangin cheng vaibelchhe 1950 pek a remti. Heng sum pekchhuah turte hi nimin khan Union Home Minister AMit Shah chuan a pawmsak a. Karnataka in cheng vaibelchhe 384 an chang ang a, Maharastra in cheng vaibelchhe 1566 an chang thung dawn a. Union Home Ministry sawidanin kuminah SDRF hnuaiah state 27 tan cheng vaibelchhe 13603 pek chhuah tawh a ni a, NDRF hnuaiah cheng vaibelchhe 2189 state 15 tan pek a ni tawh bawk a ni..

<><><>